

Newspaper	Sinar Harian
Date	3 March 2016

MAHATHIR - ANWAR SUDAH BERGABUNG, LAGI TERTUTUP LALUAN NAJIB NAK LARI.

Sinar Harian – 3 Mac 2016



Tanpa menunggu lebih lama setelah meninggalkan UMNO, Tun Mahathir Mohamad terus mengorak langkahnya dengan membentuk persefahaman dengan parti-parti pembangkang untuk menyingkirkan Najib Razak daripada kerusi Perdana Menteri.

Esok (Jumaat), jam 3.30 petang dan bertempat di Rumah Kelab Persatuan Alumni Universiti Malaya, Kuala Lumpur, bekas Perdana Menteri itu akan mengadakan sidang akhbar bersama pemimpin-pemimpin pembangkang dan seterusnya akan menandatangani deklarasi bersama untuk menuntut pengunduran Najib. Selain pemimpin-pemimpin utama Pakatan Harapan dan beberapa wakil rakyat Pas

yang akan turut hadir, yang lebih menarik ialah bila Nurul Izzah Anwar sendiri turut mengadakan sidang akhbar bagi mengalu-alukan program bersama Tun Mahathir itu.

"Ya, esok kami akan mengadakan sidang akhbar bersama Tun Mahathir pada jam 3.30 petang dan ia dilakukan dengan semangat keikhlasan untuk menyelesaikan kemelut negara.

"Bukan isu dendam, peribadi atau marah, tetapi bagaimana untuk merungkai permasalahan dan skandal yang melanda Malaysia menerusi langkah-langkah yang konkrit untuk menjalankan dan melaksanakan reformasi," tegas anak sulung Anwar yang juga merupakan Ahli Parlimen Lembah Pantai.

Dengan sedianya Nurul Izzah khususnya dan PKR amnya dalam menjalinkan kerjasama dengan Tun Mahathir esok, ia sudah boleh dianggap leburnya permusuhan antara Anwar dan keluarganya dengan bekas Perdana Menteri selama 22 tahun itu. Bermakna Tun Mahathir dan Anwar sekarang sudah "sehati sejiwa" dan "selagu seirama" dalam perjuangan menyingkirkan Najib yang dianggap beban dan lebih "durjana" kepada negara.

Jika dulu PKR ditubuhkan tidak lain untuk menjatuhkan Tun Mahathir, kini kedua-duanya menampakkan sudah saling bekerjasama menjatuhkan Najib dan menyelamatkan negara serta melupakan luka-luka lama mereka. Walaupun Anwar kini di dalam penjara, tentunya kesediaan Nurul Izzah dan PKR menjalinkan persefahaman itu sudah pun mendapat restu daripada bekas Timbalan Perdana Menteri itu sendiri.